

Headlines

- प्रधानमंत्री नरेंद्र मोदी होरें Re-Invest Global Meet-2024 च "हरित विकास" आहले भारत दे धेइए गी फही पक्का कीता।
- 8मां भारत जल सप्ताह 2024 कल नमीं दिल्ली च शुरू होग, राष्ट्रपति द्रौपदी मुर्मू होर एहदा उद्घाटन करंगन।
- केंद्री गृह मंत्री अमित शाह होरें आखेआ जे जम्मू-कश्मीर च आतंकवाद दा ऐसा खात्मका कीता जाग जे कोई इसी परतिए सुलगाने दी हिम्मत नेई करोग।
- मुख चुनां अधिकारी पी.के पाले होरें "स्वीप" तैहत मतदाता शपथ अभियान दी शुरूआत कीती, सब्बनें मतदाताएं गी वोट पाने दी सगंध चुक्कने ते एहदा सर्टिफिकेट डाउनलोड करने लेई आखेआ।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

PM-Re Invest

प्रधानमंत्री नरेंद्र मोदी होरें अज्ज आखेआ ऐ जे 140 करोड़ भारतीय, मुल्ले गी दुनिया दी त्रै सब्बनें शा बड्डिएं अर्थ बवस्थाएं च शामिल करने दा पक्का निश्चा लेइए कम्म करा करदे ना। अज्ज गुजरात दे गांधी नगर च महात्मा मंदर च चौथे कुल संसारी नवीकरणीय उर्जा निवेशक सम्मेलन ते प्रदर्शनी दा उद्घाटन करदे होई उनें एहू गल्ल आक्खी। उनें आखेआ जे एल्लै स्हाड़ी मुख कार्ज योजना भारत गी 2047 तगर इक विकसित मुख बनाना ऐ ते स्हाड़ी इस योजना दी झलक सरकार दे त्रीए कार्जकाल दे पैहले 100 दिनें दे अंदर लैते गेदे महत्वपूर्ण फैसले च साफ दिक्खने गी लबदी ऐ। चौथे रि इन्वेस्ट सम्मेलन दा सरिस्ता नमीं ते नमींकरणीय उर्जा सरबन्धी केंद्री मंत्रालय आस्सेया कीता गेदा ऐ जेदे च परती-परतिए बरती जाई सकने आली उर्जा दे क्षेत्र च कीते जा रदे कम्म ते निवेश गी उजागर कीता जा'रदा ऐ। मोदी होर अज्ज अहमदाबाद मेट्रो दे दुए फेज गी बी झंडी दस्सिए रवाना करंगन जेहड़ी अहमदाबाद गी गांधी नगर ते गुजरात दी गिफ्त सिटी कन्नै जोडगा। प्रधानमंत्री मोदी हुंदा मुल्ले दी पैहली वंदे भारत मेट्रो रेल जेहड़ी अहमदाबाद ते भुज बश्कार चलोग, समेत कोई 8 ज्हार करोड़ रपे दिएं परियोजनाएं दा उद्घाटन ते नीह पत्थर रखने दा बी कार्यक्रम ऐ।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

## India-Water Week

8मां भारत जल सप्ताह 2024 कल्लै थमां नमीं दिल्ली च शुरू होगा। राष्ट्रपति द्रौपदी मुर्मू होर भारत मंडपम च कार्यक्रम दा उद्घाटन करंगन। चऊं दिनें तोड़ी चलने आले इस आयोजन च 40 बक्ख-बक्ख मुल्ले थमां 200 कोला मते विदेशी प्रतिनिधिं दे अलावा कोई 4 जहार प्रतिनिधि शिरकत करंगन। इस मौके लोआई जाने आली नमैश च 100 कोला मते प्रदर्शक ते स्टार्ट अप्स जल क्षेत्र बारै अपने ते सुझा सब्बनें सामने रक्खंगन। नमीं दिल्ली च इक प्रेस कांफ्रेंस च इस बारै जानकारी सांझी करदे होई जल शक्ति मंत्रालय दी सचिव देबाश्री मुखर्जी होरें आखेआ जे खरे जल प्रबंधन कन्नै मुल्ले च आर्थिक विकास च तेजी औग। उनें आखेआ कि एह आयोजन जल संसाधसनें दे क्षेत्र च शोधकर्तां, महत्वपूर्ण फैसले लैने आले, माहिरें ते होरनें हितधारके कोला विचार ते सुझा हासल करने लेई इक वैश्विक मंच उपलब्ध कराग। उनें आखेआ जे इस आयोजन दा विषे सार ऐ समावेशी जल विकास ते प्रबंधन लेई सांझेदारी ते सहयोग। पंचैती राज मंत्रालय बी 8में भारत जल सप्ताह च हिस्सा लैग। मंत्रालय नै इक बयान च आखेआ जे इस कार्यक्रम च ग्राम पंचैते आस्सेया जल संरक्षण कोला लेइए बरखा दे पानी गी किट्टा करने, जिमी हेठ पानी दे स्तर गी उबड़ा चुक्कने ते किफायती जल वितरण बारै उपाएं ते विचारें गी बी सांझा कीता जाग।

<><><><><><>

## COP-9 Meet

भारत कल नमीं दिल्ली च खेड्डे च डोपिंग खलाफ युनेस्को अंतरराष्ट्रीय कन्वेंशन दे तैहत कोष स्वीकृति समिति दी त्री औपचारिक बैठक ते काँप-9 ब्यूरो दी दुई औपचारिक बैठक दी मेजबानी करोग। दऊं दिनें दा एह सम्मेलन 17 ते 18 सितंबर गी नमीं दिल्ली च लगगा रदा ऐ। काँप-9 ब्यूरो दे उपाध्यक्ष दे रूपै च भारत नै दऊं रोजा उच्च सतह दी बैठक आयोजित करने च महत्वपूर्ण भूमिका निभाई ऐ। एह बैठक दुनिया भरै दे मुख् नीति निर्धारके ते बड़ी हस्तिएं गी इक सांझा मंच प्रदान करोग। युवा मामले ते खेड्डे मंत्रालय नै आखेआ ऐ जे एह बैठक खेड्डे च इकजुटता दे नियमें गी बनाई रखने च कुल संसारी सतह पर सहयोग बारै सोच विचार करने लेई बक्ख-बक्ख मुल्ले ते अंतरराष्ट्रीय संगठनें गी इक सांझा मंच उपलब्ध करोग जिस दौरान डोपिंग रोधी मुख् मुद्दे पर चर्चा होग। एहदे च फ्रांस, इटली, रूस, साउदी अरब, बारबाडोस, सिंगापुर, नीदरलैंड्स, तुर्की, संयुक्त अरब अमीरात ते जाम्बिया सने कई होर मुल्ले दे प्रतिनिधि हिस्सा लै करदे ना।

<><><><><><>

## PF-MS JK

जम्मू-कश्मीर सरकार नै वित्तीय पारदर्शिता ते नियमें गी मजबूत करने बक्खी इक होर गें पुट्टेदे होई वित्तीय लैन देन च PFMS प्रणाली गी लागू करने दी घोषणा कीती ऐ। वित्तीय बरे 2024-25 च जम्मू-कश्मीर पोलीस दे कर्मिं दी तनखाह ते गृह मंत्रालय कन्नै जुड़े दे लैन-देन गी PFMS दे दायरे च आंदा जाग।

<><><><><><>

## Poonch-Election

जियां-जियां चुनां दा ध्याड़ा कोल आवा करदे न मतदाताएं टकोहदा करिए पैहली बारी वोट पाने जा'रदे नौजवानें अंदर बड़ा मता उत्साह दिक्खने गी लब्बा रदा ऐ। स्हाड़े पुंछ आले जिला संवाददाता अनुभव मिसरी नै इनें मतदाताएं कन्नै गल्लबात कीती ते दस्सेया जे एहू नौजवान इस करिए बी उत्साहित न जे ओहू अपनी मर्जी दे नुमायंदे चुनिए सरकार बनाने च योगदान देंगन। इनें नौजवानें सब्बनें गी अपील कीती ऐ जे ओहू 25 तरीक गी वोट जरूर पान।

<><><><><><>

## SVEEP-Rajouri

राजौरी जिला प्रशासन नै रंगमंच थियेटर ग्रुप दे सहयोग कन्नै राजौरी च इक नाटक कराया जेहदा शीर्षक हा। लोकतंत्र या असली मंच। स्वीप अभियान तैहत राए गेदे इस आयोजन दा मकसद लोकें गी वोट पाने दे अधिकारें बारै जागरूक करना हा। राजौरी जिला संवाददाता मुजब कलाकारें इक स्किट राएं बी लोकें वोट पाने आस्तै प्रेरित कीता। बक्ख-बक्ख स्कूलें दे विद्यार्थी ते मती गिनतरी च आम लोकें कार्यक्रमें गी दिक्खेआ।

<><><><><><>

## Shah-Election Rally

भारतीय जनता पार्टी दे सीनियरदनेता ते केंद्री गृह मंत्री अमित शाह होरें अज्ज आखेआ जे जम्मू-कश्मीर च आतंकवाद गी परतिए जिंदा करने दे जत्त होआ रदे न, पर आतंकवाद गी इन्ना हेठ दबाई दित्ता जाग जे ओहू परतिए कदें बी उट्टी नेई सकग। आकाशवाणी जम्मू संवाददाता मुजब अमित शाह होरें आखेआ जे कांग्रेस ते नेशनल कांफ्रेंस दे चुनां घोषणा पत्र च आतंकवादिएं गी छोड़ने दी गल्ल कीती गेदी ऐ। उनें आखेआ जे एहू मोदी सरकार ऐ ते कुसै गी बी जम्मू-कश्मीर च आतंकवाद गी बहाल नेई करन दित्ता जाग। श्री शाह होर पाडर नागसेनी च बीजेपी

मेदवार ते साबका मंत्री सुनील शर्मा हुंदे समर्थन च इक चुनाव रैली गी संबोधित करा करदे हे। उनें अगगे आखेआ जे जम्मू-कश्मीर च सरकार नेई बनान दिती जाग। उनें आखेआ जे मुकाबला दऊं सियासी ताकतें बश्कार ऐ जित्थे इक पास्सै भारतीय जनता पार्टी ऐ ते दुए पास्से नेशनल कांफ्रेंस ते पीडीपी च। उनें आखेआ जे न गै अब्दुल्ला परिवार ते ना गै राहुल परिवार दी पार्टीं गी जम्मू-कश्मीर च सत्ता च औन दिता जाग। गृह मंत्री हुंदा पिछले 15 दिनें च जम्मू इलाके दा एहू दुआ दौरा ऐ।

<><><><><><>

### NC-AIP

नेशनल कांफ्रेंस दे सीनियर नेता ओमर अब्दुल्ला होरें आखेआ जे लोकसभा मैम्बर अब्दुल रशीद दी अवामी इत्तेहाद पार्टी ते जमात इस्लामी बश्कार रिश्तें गी उंदी पार्टी खिलाफ इस्तेमाल करने दी कोशिश कीती जा रदी ऐ। आकाशवाणी जम्मू संवाददाता मुजब साबका मुख्मन्त्री होर A.I.P. ते प्रतिबंधित जमात इस्लामी दे मिम्बरें बश्कार तालमेल पर प्रतिक्रिया देआ रदे हे। ओमर अब्दुल्ला होर पुलवामा जिले दे पाम्पोर विधानसभा हल्के च अज्ज रिपोर्टिं कन्नै गल्लबात करा रदे हे। श्रीनगर च प्रधानमंत्री हुंदी चुनां रैली च 30 ज्हार लोकें दे शामिल होने दे बीजेपी दे दावें बारै पुच्छे जाने पर उनें आखेआ जे लोकें गी कट्टा कीता जाई सकदा ऐ, पर ओदा मतलब एहू नेई ऐ जे वोट बी थ्होई सकदे ना। उनें दावा कीता जे कश्मीर घाटी च बीजेपी गी इक बी सीपट नेई थ्होग।

<><><><><><>

### CEO-SVEEP

जम्मू-कश्मीर दे मुख्म चुनां अधिकारी होरें स्वीप अभियान तैहत इक मतदाता शपथ मुहिम शुरू कराई जेदा मकसद विधानसभा चुनां शा पैहले एहू जागरूकता पेदा करना ऐ जे लोक मती शा मती गिनतरी च जाइए वोट पान। मतदाता शपथ प्रमाण पत्र हासिल करने दे इच्छुक लोक [sveepjk.in](http://sveepjk.in) पर जाइए लोडचदी शपथ लैने मगरा मुख्म चुनां अधिकारी हुंदे हस्ताक्षर आला प्रमाण पत्र लेई सकदे ना। मुख्म चुनां अधिकारी पांडुरंग के. पोले होरें इस मौके पर जम्मू-कश्मीर दे मतदाताएं गी आखेआ जे ओहू मतदाता सगंध जरूर लैन ते अपना-अपना प्रमाण पत्र हासिल करन।

<><><><><><>

## SVEEP-Doda

डोडा जिले च मतदाताएं च जागरूकता पैदा करने ते उनेंगी वोट पाने लेई प्रेरित करने लेई स्वीप तैहत शुरू कीती गेदियां ते म्हीने भर चली दियां गतिविधियां अज्ज भद्रवाह च इक शानदार सांस्कृतिक कार्यक्रम कन्नै सम्पन्न होई गेइयां। जिला चुनां अफसर हरविंदर सिंह होरें आखेआ जे स्वीप गतिविधिएं दे नतीजे दे तौरा पर 18 सितंबर गी रिकार्ड 80-85 प्रतिशत मतदान होई सकदा ऐ। अज्ज समापन मौके पर केई गतिविधिएं दा सरिस्ता कीता गया जिंदे च सांस्कृतिक कार्यक्रम, वोट पाने दे तरीके दा भ्यास, नुक्कड़ नाटक ते होर दुए कार्यक्रम शामिल ना।

<><><><><><>

## First Tim Voters Kishtwar

आई.टी.आई किशतवाड़ च पढा करदे विद्यार्थी जेडे 18 बरें दे होई चुके दे न ओहू बड़ी बेसब्री कन्नै 18 तरीक गी बलगा करदे न, जदूं ओहू पैहली बारी वोट पाने दे अपने अधिकार दा इस्तेमाल करंगन। स्हाड़े जिला संवाददाता केलाश नाथ नै जानकारी दिती ऐ जे बच्चे भारती चुनां आयोग दा आभार प्रगट करदे नै जिन्ने बड़ी गै बवस्था आले ढंगै सिर दूर दरेडे इलाकें दे नौजवानें दे नां बी मतदाता सूचिएं च दर्ज कराए जेडे मसां 18 साल दे होए न ते ओहू हून अपनी मर्जी कन्नै अपने सांसद या विधायक चुनी सकदे ना।

<><><><><><>

## Basohli Utsav 2024

बसोहली उत्सव 2024 जेहड़ा 10 थमां 12 अक्तूबर 2024 गी होना मित्थेआ गेदा ऐ, ओदी तैयारिएं गित्तै संस्कृति विभाग दे प्रिंसीपल सैक्रेटरी सुदेश कुमार गुप्ता ते जम्मू दे डिविजनल कमिशनर रमेश कुमार होरें इक्क मीटिंग दी अध्यक्षता कीती। बसोहली उत्सव च मकामी कला ते संस्कृति गी प्रदर्शित कीता जाग जेदे च विश्व प्रसिद्ध बसोहली चित्रकारी, सांस्कृतिक कार्यक्रम, हस्तलेख प्रदर्शनी, किताब मेला, धार्मिक ते विरासती थहरें दे दौरे ते दुइयां गतिविधियां शामिल ना। उत्सव च औने आलें गी मुकामी खानपान दे अलावा किशती दे सोआरी ते वाटर स्पोर्ट्स दा आनन्द लैने दा मौका बी थ्होग। मीटिंग च बसोहली उत्सव गी शानदार ढंगै कन्नै कराने लेई प्रबंधें पर ब्यौरेवार चर्चा कीती गेई।

<><><><><><>

## ADGP-Facebook

जम्मू-कश्मीर पुलस नै एडजीपी जम्मू जोन आनंद जैन हुंदे नां पर इक फर्जी फेसबुक अकाउंट बारे लोकें गी सोहगा करदे होई इस कन्नै नेई जुडने दी सलाह दिती ऐ। पुलसै लोकें गी आगाह कीता ऐ जे कुसै बी जानकारी लेई ओहू जम्मू-कश्मीर पुलसै दे तस्दीकशुदा सोशल मीडिया हैंडल्स पर जान, उआं इस फर्जी एकाउंट बारे जांच कीती जा रदी ऐ।

<><><><><><>